

PAGTULON-AN 7 – ANG KASAL DIHA SA DALAN SA SAAD

Genesis 24

TEMA: Pagpakita sa pagkahaduol sa magtotoo kang Cristo karon ug sa kahangturan.

Gusto kita motambong sa mga kasal. Diha sa kasal, nagakalipay kita kauban sa duha ka tawo nga nagamalipayon nga magausa sa ilang mga kasingkasing ug mga kinabuhi diha sa gugma. Nagatoo ka ba nga ang Dios magagiya sa tawo sa pagpili sa ilang kapikas sa kinabuhi? Siya magagiya kanila nga nagamatimuman sa pagsunod sa Iyang pagtulon-an, ug nagasalig sa Iyang mga saad nga gihatag kanato pinaagi ni apostol Pablo.

Si apostol Pablo nagapahimangno kanato nga kita, nga nagakinabuhi niining hugna sa grasya, ang mga magtotoo dili magminyos sa mga dili magtotoo. Kini iyang gisulti sa 2 Corinto 6:14-15: “Ayaw kamo pagpahiangay sa inyong kaugalingon kauban sa mga dili magtotoo diha sa mao rang usa ka yugo. Kay unsa may kigkomboyahan sa mga matarung ug sa dili matarung? O unsa may pakig-ambitan sa kahayag ug sa kangitngit? Unsa may pakig-uyonan ni Cristo kang Bilyal? O unsa may iya sa magtotoo nga pakigsalohan sa dili magtotoo?” Ug siya misaad kanato sa Roma 8:28: “Kita nasayud nga diha sa matag-usa ka butang ang Dios nagabuhat ug maayo uban kanila nga mga nahigugma Kaniya ug mga tinawag sumala sa Iyang katuyoan.”

Karon sa magasubay kita sa DALAN SA SAAD, makita nato giunsa sa Dios paggiya sa pagpangita ug maasawa si Isaac. Unya motambong kita sa kasal, bisan ang kasal nila kaniadto lahi ra kaayo sa mga kasal sa atong panahon karon.

Human milabay ang daghang mga katuigan, si Sarah namatay ug tigulang na kaayo si Abraham. Siya mihukom nga panahon na nga si Isaac magminyos. Gitawag ni Abraham ang iyang sinaligan nga katabang ug kini iyang gipapanumpa sa Dios sa langit, ug Dios sa yuta; nga dili siya magpili ug pangasaw-unon alang kang Isaac diha sa mga pagano nga Canaanhon, apan moadto hinuon siya sa kaliwatan ni Abraham (Genesis 24:2-4).

Ang alagad ni Abraham milakaw kauban ang napulo (10) ka kamelyo nga nagadala sa kinahanglanon ug mga gasa alang sa babaye nga mahimo unyang asawa ni Isaac. Sa dihang miabut siya sa gawas sa siyudad sa Nahor, sa Mesopotamia; siya mihunong sa may tubod sa tubig. Panahon kadto nga ang mga kababayen-an mukuha ug tubig. Ang alagad ni Abraham nag-ampo aron giyahan siya ug mihangyo sa Dios nga tultolan siya ngadto sa babaye nga maasawa ni Isaac. Siya nangayo nga unta ang babaye nga mukuha ug tubig alang kaniya ug sa iyang mga kamelyo usab mao ang gipili. Ug siya naghulat aron sa pagtan-aw sa tubag sa Dios.

Pagkataudtaud si Rebecca miabut ug nangayo siya ug tubig aron siya makainom. Dihadiha siya gihatagan ug tubig apil usab ang iyang mga kamelyo. Ang babaye miingon nga siya parente sa igsoon ni Abraham nga si Nahor ug sa ingon niana nahiuyon siya sa mga kinahanglanon. Ang alagad miduko sa iyang ulo ug misimba sa Dios. Siya gidapit ni Laban, ang igsoon ni Rebecca ug busa misulod siya sa ilang balay. Ug didto iyang gisulti ang iyang tuyo ngano nga miabut siya ug ang nahitabo didto sa tubod sa tubig.

Si Laban ug si Bethuel, ang amahan ni Rebecca mitubag: “Ang mga butang nagagikan ni Jehovah busa wala kami ikasulti kanimo nga dautan o maayo. Ania si Rebecca sa imong atubangan, dalha siya ug mahimo siyang asawa sa anak sa imong agalon sumala sa gisulti ni Jehovah.” Ang alagad mihatag sa mga gasa ngadto sa pamilya ni Rebecca aron sa pagpamatuod sa kadatu ug kahimtang ni Isaac. Ug unya siya ug ang iyang mga kauban sa panaw nangaon ug nanginom nianang gabhiona.



Tinubdan: Sweet Publishing – kini ilustrasyon lamang sa Genesis 24:61

Pagkasunod adlaw, ang alagad ni Abraham gusto nang mouli balik sa iyang agalon, apan si Laban ug ang inahan ni Rebecca gusto pa nga siya magpabilin pa ug napulo (10) ka adlaw. Ilang gitawag si Rebecca ug giingnan, “Mouban ka ba niining tawhana?” Ug siya mitubag, “Oo mouban ko.” Wala siya mahadlok moadto sa langyaw nga yuta ug mga tawo tungod kay Nagatoo siya nga ang Dios nga nagauban sa alagad makahimo usab sa pag-atiman kaniya. Si Rebecca wala mabalaka sa kalisud ug kakuyaw sa panaw, tungod kay naglantaw siya sa iyang pagpakigkita sa lalaki kang kinsa mahimo siyang asawa niini.

Usa ka hapon, si Isaac miadto ngadto sa uma aron mamalandong. Iyang giyahat ang iyang mga mata ug nakita niya ang mga kamelyo nga nagsingabut. Ang alagad misulti kang Isaac sa tanang nahitabo ug gidala si Rebecca ngadto sa tolda sa iyang inahan nga si Sarah aron mahimo niya nga asawa. Mao kadto ang ilang kasal. Gihigugma pag-ayo ni Isaac si Rebecca, tungod kay nasayud siya nga ang Dios maoy naghatag ni Rebecca kaniya aron mahimong niyang asawa.

Kita susama ni Rebecca sa pipila ka mga butang. Kita usab nagapanaw niining kinabuhia ngadto sa pagpakigkita sa Usa nga wala nato makita sukad. Apan ang atong panagtagbo mahitabo diha sa kahanginan. Busa, ang SAKYANAN SA KALUWASAN nagapakita sa tanan nga ang misalig lamang ni Jesu-Cristo ingon nga ilang kaugalingon nga Manluluwas gikan sa silot sa sala nga mao ang impiyerno ug nagapaabut sa pagtawag sa Dios gikan sa langit, 1 Tesalonica 4:16. Ang Balaang Espiritu magatug-an kanato mahitungod Kaniya samtang kita magapanaw. Wala kita makakita Kaniya, apan ato Siyang gihigugma ug gusto kita magsulti mahitungod Kaniya ug magbasa sa Iyang giya nga mao ang Bibliya. Diha sa Bibliya, nagatug-an Siya kanato mahitungod sa atong espirituhanong mga panalangin ug sa atong kahimtang uban Kaniya diha sa mga langitnong dapit. Didto unya makighiusa kita Kaniya sa wala nay katapusan, Efeso 1 ug 2. Sa pagkakaran, kita magapakigsulti Kaniya diha sa pag-ampo ug nahimo kitang mga tinugyanan Niya sa pagmantala sa maayong balita sa Dios ngadto sa mga nangawala.

Ang kasal ni Isaac ug Rebecca usa ka talagsaon nga kasal. Kay kadaghanan sa mga tawo gusto ug daku nga kasaulogan. Kini maayo kon kita nahibalo nga ang yawi sa malipayon nga kaminyoon, mao ang gugma ug pagtahod. Ug ang Pulong sa Dios mao ang pinakauna.

SAG-ULOHON NGA BERSIKULO: “Kita nasayud nga diha sa matag-usa ka butang ang Dios nagabuhat ug maayo uban kanila nga mga nahigugma Kaniya ug mga tinawag sumala sa Iyang katuyoan.” Roma 8:28.

PAGTULON-AN 7 – BULOHATON

Direksyon: Isulat ang hustong tubag sa mga pamahayag o pangutana.

1. Unsa nga paagi sa pagpanaw ang gigamit ni Rebecca? Genesis 24:61.
_____.
2. Unsa ang klasing panimalay naa sila si Isaac ug Rebecca? Genesis 24:67. _____.
3. Unsa ang mga gasa nga nadawat ni Rebecca? Genesis 24:22. _____

_____.
4. Asa man nagkita ang alagad ug si Rebecca? Genesis 24:13. _____
_____.

Isulat sa ubos aron sa pagpakita nga ang kasinatian ni Isaac ug Rebecca pareha sa atong kasinatian karon sa panahon sa grasya.

5. Si Isaac migawas aron pagtagbo ni Rebecca. Si Cristo mugawas gikan sa _____ aron sa pagtagbo kanato. 1 Tes. 4:16.
6. Si Rebecca nakig-apon gayud ni Isaac. Kita makig-uban ni Cristo didto _____ 1 Tes. 4:17.
7. Si Rebecca maoy usa ka kahupayan kauban ni Isaac. Kita usab _____ sa usag- usa tungod sa saad nga makigtabo kita sa Ginoo diha sa kahanginan. 1 Tes. 4:18.
8. Si Isaac nahigugma pag-ayo kang Rebecca ug si Cristo _____ kanato. Roma 8:37.
9. Si Rebecca nagalantaw sa pagpakigkita ni Isaac samtang siya nagapanaw. Kita usab _____ sa pagpakigtambo sa Ginoong Jesus, samtang kita nagapanaw sa DALAN SA KINABUHI, Tito 2:13.
10. Isulat ang Roma 8:28: _____

_____.